

Intervista cun Barbara Riedhauser

La collavuratura regiunala da la Lia Rumantscha en il Grischun central

CUN BARBARA RIEDHAUSER
HA DISCURRÌ MARIO PULT/LR

Tge lavur concreta has ti fatg en connex cun il project surmenziunà?

L'emprim èsi stà d'organisar sedutas da preparaziun cun tut ils pertutgads. L'emprima pagina sutsilvana è lura cumparida il 1. da mars 2011. A partir da quel mument hai jau fatg la coordinaziun cun la planisaziun a lunga vista. Mintgatant han ils giuvens era proponì sez in tema. Jau hai lura mintga emna rimnà il material ch'els han scrit e lectorà quel. Suentar hai jau infurmà l'anr davart quai che vegn da la Sutselva e tramess ils artitgels e las fotografias a la redacziun da La Quotidiana..

Quants giuvens eran quai e tge era lur motivaziun?

Il mars 2011 avain nus cumenzà cun otg persunas, pli tard han insaquantas chalà ed autras èn vegnidas vitiers. Actualmain fan tshintg persunas part da la grupp. Lur motivaziun è da contribuir activamain insatge a la cultura rumantscha en Val Schons.

Tge experientschas has ti fatg cun ils collavurators libers?

Els han lavurà cun grond engaschament e scrit artitgels interessants. Den-

tant èn ils giuvens savens limitads quai che pertutga il temp. Ina gronda part fa in studi ed ha da scriver lavurs e da sa preparar per examens. Ils blers han gù a l'entschatta grondas retegnientschas da scriver rumantsch. A partir da la sisavla classa han els strusch pli fatg quai. Ma cunquai che lur texts vegnivan lectorads han els pudì profitar e sa sviluppar,

uschia che questas temas èn prest stadas svanidas.

Co èn stads ils resuns en Val Schons?

Ils resuns èn stads positivs a partir da l'entschatta. Ils redactors han survegnì reacziuns directas – quai è fitg impurtant per lur motivaziun. Igl è

impurtant da dir sche insatge vegn fatg bain!

Co è sa dada la situaziun dad oz cun ina redactura fixa?

Durant differentas scuntradas cun ils responsabels da l'anr ha la Lia Rumantscha punctuà che la soluziun possia es-

ser mo transitorica e ch'i saja chaussa da l'anr da procurar per ina persuna che fa la redacziun/coordinaziun en Val Schons. L'anr ha gù la fortuna da chattar ina redactura cun *Tina Clopath-Sulser*.

Tgi èn ils tshintg collavurators libers che cuntinuan da scriver?

Quai èn *Romina Beeli, Martina Cantieni, Dario Dolf, Dorothe Dolf* ed *Ursina Dolf*.

Tge signifitga quai per tia lavur e per la situaziun linguistica en la Val?

Mintga emna nossa pagina sutsilvana

Jau n'hai betg pli da far la coordinaziun, quai che dat spazi per autras activitads a favur dal rumantsch en la regiun. Jau infurmesch la nova redactura davart temas che ma paran interessants sco quai che mintga persuna po e duai era far. Per il rumantsch en Val Schons signifitga questa situaziun che nus avain mintga emna nossa pagina sutsilvana. Plinavant ma pari bun sche la «lavor rumantscha» en la Val vegn fatga da tantas persunas sco pussaivel e na sa concentrescha betg sin in post.



Tina Clopath (san.) a Barbara Riedhauser.